

Allaah Taa'alā Ne Apnā Waadā Purā Kiyā

Iḥjeel : Shaagirdoñ Ke Āmaal 3:1-16

Ek din janaab Patras aur janaab Yuhannā Yerushalam kī ibaadatgaah me jā rahe the. Wo dopahar teen bajे kī ibaadat kā waqt thā. ⁽¹⁾ Wahaan, ibaadatgaah ke darwaaze par jisko Ḳhubsurat darwaazā bhī kahte the, ek paideaishī laṅgḍā baithā rahtā thā. Har din usko us darwaaze par uṭhā kar laayā jaatā thā taaki wo wahaan baiṭh kar bheek maaṅg sake. Wo ibaadat gaah ke añdar jaane waale logoñ se bheek maaṅgtā thā. ⁽²⁾ Us ādmī ne jab janaab Patras aur janaab Yuhannā ko añdar jaate dekhā to usne paison kī fariyaad kari. ⁽³⁾ Janaab Patras aur janaab Yuhannā ne uskī taraf dekh kar kahā, "Hamaarī taraf dekho!" ⁽⁴⁾ Us ādmī ne unkī taraf dekhā; usko lagā ki wo use kuch dene waale haiñ. ⁽⁵⁾ Lekin, janaab Patras ne kahā, "Mere paas sonā-chaāñdī naheeñ hai, lekin mere paas kuch aur hai jo maiñ tumheñ de saktā huñ: Naazreth kā Īsā^(a.s) kī taaqat se uṭh khađe ho aur chalo!" ⁽⁶⁾

Tab janaab Patras ne us ādmī kā seedhā haath pakađ kar upar uṭhaayā aur usī waqt us ādmī ke pair aur ghuṭne mazbut ho gae. ⁽⁷⁾

Wo uchāl kar apne paipoñ par khađā ho gayā aur chalne lagā. Wo uchālne-kudne lagā aur Allaah taa'alā kī hamd-o-sanā kartā huā unke saath ibaadatgaah me chalā gayā. ⁽⁸⁾ Saare logoñ ne use Allaah taa'alā kī taareef karte hue sunā. ⁽⁹⁾ Un sab logoñ ne use pahachaan liyā ki ye wahī paideaishī laṅgḍā hai jo Ḳhubsurat darwaaze par roz bheek maaṅgtā thā. Log ye dekh kar bahut hairaan the aur samajh naheeñ pā rahe the ki ye sab kaise ho gayā. ⁽¹⁰⁾

Wo ādmī janaab Patras aur janaab Yuhannā ko pakđe hue thā. Saare log daud kar ibaadatgaah ke āñgan me us jagah jamā ho gae. Ibaadatgaah ke us āñgan ko Sulemaan^(a.s) kā āñgan bhī kahte the. Sabhī log hairat se bhare hue the. ⁽¹¹⁾ Jab janaab Patras ne ye dekhā, to unhone logoñ se kahā, "Ibraanī logoñ, tum itnā hairaan kyuñ ho? Tum log hameñ ghur kyuñ rahe ho? Kyā hamne is ādmī ko apnī taaqat se yā apne nek amal se chalne-phirne ke laayak banaayā hai. Naheeñ! ⁽¹²⁾ Ye Allaah rabbul kareem ne ye kiyā hai, jis par Ibraaheem^(a.s), Ishaaq^(a.s) aur Yaaqub^(a.s) īmaan rakhte the. Us rab ne kī jiskī ibaadat buzurg bhī karte the, usī ne apne ġulaam Īsā^(a.s) ko izzat baķshī hai. Wo wahī the jinko tum logoñ ne Romī gawarnar, Peelaatus, ke hawaale kar diyā thā. ⁽¹³⁾ Jab Peelaatus ne unko āzaad karne kā faisla karā to tumne manā kar diyā. Unke badle me tumne ek gunaahgaar, baraabbas, ko āzaad karwaayā. ⁽¹⁴⁾ Tab tumne Peelaatus se kahā ki unko qatl kar do jo ziñdagī atā karne waalā hai! Lekin Allaah taa'alā ne unheñ ziñdā kar diyā. Ham sab is baat ke gawaah haiñ. ⁽¹⁵⁾ Is ādmī ko jise tum jaante ho, Īsā^(a.s) ke naam par yaqeen hone kī wajah se shifā milī hai. Ye ādmī purī tarah se islie ṭheek ho gayā kyuñki ye Īsā^(a.s) par īmaan laayā hai. ⁽¹⁶⁾